

# 500 onns refurma: Baselgia bain en moviment er en l'avegnir?

DA HANS-PETER SCHREICH

■ **Fitg probabel na vegn la proxima vaira Refurma (dapli ch'ina refurmin) betg tras in refurmatur ed er betg tras las baselgias sezzas, mabain tras la societad!** Guardain la statistica: Il 1910 tutgan 98% da la populaziun svizra ad ina baselgia chantunala (56% ref., 42% cat.). L'onn 2000 èn quai anc 75% (33% ref., 42% cat.) ed 11% senza confessiun. E 15 onns pli tard, il 2015, s'audan mo anc bun 60% tar ina da las duas baselgias chantunalas, passa 20% decleran dad esser senza confessiun ed il rest appartegn ad autras religiuns.

Damai: Cumbain ch'ins metta pais sin «valurs cristianas» vegnan las baselgias chantunalas a perder lur maioritad radicalmain! Ina gronda schelta da religiuns e baselgias pretenda lura in tractament egual tras il stadi neutral.

E quai ha consequenzas. Ina giada per il stadi che sto tractar tut las religiuns e baselgias en medema maniera sco «cuminanzas religiosas», quai vul dir: Nagin privilegi d'impostas, mabain in'imposta da mandat ch'ins po conceder libramain a l'ina u l'autra religiun u baselgia. Nagina instrucziun da religiun en scola. E probabel er naginas facultads da teologia a l'universitad.

Da l'autra vart pertutga quai las baselgias che vegnan a stuair s'organisar cun bler pli paucs commembers e bler pli paucs meds finansials, e quai vul dir: Vendita da las bleras baselgias al maun public u a privats che nizzegian quellas sco museums, salas da concert, u che dattan er quellas a fit per tschertas funcziuns religiosas.

Grondas midadas er en il sectur da scolaziun dals plevons: Be pli ina facultad teologica ecumenica ed independenta dal stadi. In studi da bachelor a distanza per catechets, diacons e predicaturs laics.

Ils reverendas han – dasper lur lavur ed in salari fitg modest da la baselgia – er ina mesa piazza en ina professiun «civila». Las raspadas èn bler pli pitschnas sin territoris bler pli vasts, bleras da quellas senza reverenda, persuerter dapli cum-petenzas per laics scolads. Instrucziun religiosa mo anc ordaifer la scola.

Talas midadas vegnan ad avair effect per il singul che sto s'obligar da prestar lavur gratuita e gidar a financiar la raspada. En ina societad seculara sto mintgin sez savair pertge ch'el fa part d'ina baselgia.

Tge far cun talas perspectivas? Betg gist sfurzar, ma er betg cumbatter u pruvar da franar in tal svilup. Plitost prender quel sco sfida e schanza – e sa preparar gia ussa!

L'autur è reverenda pensünà

